



**LAPORAN LIPUTAN MEDIA HARIAN
AHAD 11 SEPTEMBER 2022**

BIL	TAJUK KERATAN ANHBAR	KEMENTERIAN / JABATAN / AGENSI
1.	PENGAJIAN PERCUMA PROGRAM AGROMAKANAN UNTUK ANAK ANDA, SH -ONLINE	LAIN-LAIN
2.	HARGA SAYUR NAIK MENDADAK, SARAWAK VOICE -ONLINE	
3.	KPDNHEP PANTAU HARGA IKAN, SAYURAN, HM -ONLINE	
4.	JPS NEGERI SEMBILAN BINA, NAIK TARAF TUJUH SKIM PENGAIRAN SAWAH PADI, UM -ONLINE	
5.	PERTANIAN MODEN AKAN DIBANGUN DI SRI AMAN: ABANG JOHARI, SARAWAK VOICE -ONLINE	

UKKMAFI

UNIT KOMUNIKASI KORPORAT
KEMENTERIAN PERTANIAN DAN INDUSTRI MAKANAN
(UNTUK EDARAN DALAMAN MAFI, JABATAN DAN AGENSI SAHAJA)

TARIKH	MEDIA	RUANGAN	MUKA SURAT
11/9/2022	SINAR HARIAN	ONLINE	

Pengajian percuma program agromakanan untuk anak muda



Program persijilan latihan pertanian yang tidak mengenakan sebarang yuran pengajian kepada pelajar.

PUTRAJAYA - Sebanyak sembilan bidang pengajian ditawarkan secara percuma kepada belia berusia 18 hingga 25 tahun yang berminat dalam menceburi bidang agromakanan.

Setiap program itu dijalankan dengan berteraskan Standard Kemahiran Pekerjaan Kebangsaan (SPKP).

Pengarah Bahagian Pembangunan Kapasiti dan Latihan Pertanian (BPKLP), Hussin Mahmud berkata, bidang pengajian yang ditawarkan meliputi pensijilan Sijil Kemahiran Malaysia (SKM) tahap satu hingga tiga dan Diploma Kemahiran Malaysia (DKM) tahap empat.

“Kursus yang ditawarkan adalah dalam bidang tanaman, pemasaran, pengeluaran makanan (pemprosesan), ternakan air tawar, akuakultur marin, ternakan poltri, ternakan ruminan, teknologi perikanan tangkapan dan pengeluaran padi,” katanya.



Hussin Mahmud

Menurutnya, semua kursus yang ditawarkan di bawah BPKLP tiada dikenakan yuran pengajian. Malah, pelajar turut diberikan elaun RM200 hingga RM300 sebulan sehingga tamat tempoh pengajian selain penginapan dan makan serta minuman disediakan.

“Kursus ini memfokuskan 30 peratus teori dan 70 peratus latihan amali, manakala kurikulum pembelajaran disemak setiap lima tahun yang

turut membabitkan penglibatan industri.

“Jadi tidak timbul isu kerana graduan kita adalah memenuhi keperluan industri pada masa kini,” tambahnya.

Ujar beliau, teknologi terkini di dalam sektor agromakanan turut digunakan semasa sesi pengajian agar graduan BPKLP kompeten selari dengan peredaran zaman.

Jelasnya, kualiti penyampaian latihan telah dipertingkatkan bagi menambahbaik kemudahan pengajaran dan pembelajaran yang terkini seperti model kilang tanaman (IoT), closed house ternakan dan tanaman, penggunaan dron serta kolam pembelajaran akuakultur.

Kaedah teknologi

Menurut Hussin, penggunaan teknologi dalam pembelajaran turut menarik minat lebih ramai pelatih.

“Rata-rata anak muda berminat mengaplikasikan teknologi dalam bidang agromakanan. Ia bukan sekadar memudahkan, malah lebih menjimatkan kos iaitu tidak memerlukan ramai pekerja,” katanya.

Tambah beliau, terdapat 14 pusat latihan bertauliah di bawah Kementerian Pertanian dan Industri Makanan (MAFI) di seluruh negara.

“Antaranya, Institut Teknologi Unggas di Masjid Tanah, Melaka bagi bidang ternakan poltri; Kolej Perikanan Sultan Nazrin Muizzuddin Shah, Perak (akuakultur dan teknologi perikanan tangkapan) dan Pusat Latihan Institut Penyelidikan dan Kemajuan Pertanian Malaysia (MARDI), Serdang, Selangor bagi kursus pemprosesan makanan,” katanya.



Subsektor agromakanan mampu memberi pulangan lumayan kepada graduan BPKLP menjadi usahawan dalam sektor ini.

Beliau berkata, kesemua program BPKLP bertujuan untuk menggalakkan generasi muda melibatkan diri dalam bidang agromakanan melalui penggunaan teknologi terkini bagi meningkatkan kualiti dan produktiviti subsektor agromakanan.

Ia selaras dengan hasrat Perdana Menteri, Datuk Seri Ismail Sabri Yaakob yang mahu tumpuan diberikan terhadap pembangunan sektor itu bagi mengurangkan kebergantungan keperluan makanan rakyat Malaysia terhadap makanan import.

“Kursus jangka pendek turut ditawarkan kepada kumpulan sasar bagi meningkatkan pengetahuan kemahiran dan pengetahuan berdasarkan bidang pengkhususan masing-masing yang dikendalikan oleh agensi di bawah MAFI,” katanya.

Syarat minimum

Mengulas mengenai syarat kemasukan SKM, Hussin berkata, BPKLP menetapkan syarat minimum agar lebih ramai individu yang mempunyai minat dalam bidang agromakanan berpeluang untuk menyertainya.

“Pelatih disyaratkan boleh membaca, menulis dan mengira, sihat tubuh badan selain mestilah warganegara Malaysia,” katanya.

Menurutnya, permohonan boleh dibuat sepanjang tahun di laman sesawang <https://www.mafi.gov.my/blkp>.

Permohonan dibuka sepanjang tahun tetapi pengambilan dibuat dua kali setahun iaitu Mac dan September.

Ditanya mengenai sasaran bagi pengambilan September ini, beliau berkata, pihaknya menjangka 600 pelatih baharu di lima pusat latihan kerana sebahagian pusat latihan tidak dapat menerima pelatih disebabkan kerja naik taraf.

Menurut Hussin, subsektor agromakanan memberi pulangan lumayan kepada graduan BPKLP menjadi usahawan dalam sektor ini.

“Ramai pelatih kami yang mengusahakan sektor ini telah menikmati hasil lumayan antara RM4,000 sebulan sehingga puluhan ribu ringgit bagi setiap pusingan,” katanya.

Tegasnya, stigma negatif terhadap sektor ini seharusnya perlu dihapuskan.

“Jika ia benar-benar diusahakan mengikut jalan yang betul, insya-ALLAH sektor ini tidak akan menghampakan. Sebagai contoh, kursus poltri dan ruminan menjadi pilihan utama pelatih kerana potensi besar.

“Lagi pun industri ini sudah beralih kepada konsep closed house yang mana reban dan kandang dikawal sepenuhnya oleh mesin. Ini sangat menjimatkan,” katanya.

Sejak tahun 2004, BPKLP telah melahirkan 7,875 graduan SKM dan DKM dan 22,157 individu menyertai kursus jangka pendek sepanjang penganjurannya.

Syarat permohonan dan kemudahan:

Warganegara Malaysia.

Berumur 18 hingga 25 tahun.

Boleh membaca, mengira dan menulis.

Sihat tubuh badan. Yuran pengajian percuma.

Elaun RM200 hingga RM300.

Penginapan disediakan.

Makan dan minum disediakan.

Permohonan dibuka sepanjang tahun.

TARIKH	MEDIA	RUANGAN	MUKA SURAT
11/9/2022	SARAWAK VOICE	ONLINE	

Harga sayur naik mendadak



KUCHING: Harga beberapa sayur dikatakan meningkat ketara berbanding dahulu. Tinjauan di Pasar Komuniti Stutong mendapati harga sayur seperti sawi mengalami peningkatan harga yang ketara.

Peniaga mendakwa harga sayur terpaksa dinaikkan kerana bekalan yang diterima dibeli pada harga yang tinggi. Peniaga, Chiew Siat fong, 54, berkata, kenaikan

harga sayur turut menjejaskan ekonomi peniaga serta pelanggan.

“Sawi merupakan sayur yang paling ketara sekali naik, dahulu sawi dijual kira-kira RM8 hingga RM10 sekilogram, tetapi sekarang saya terpaksa jual RM15 sekilogram.

“Selain itu, harga sawi sekarang naik disebabkan bekalan susah untuk didapati terutamanya pada musim tengkujuh sekarang.

“Jika kami (peniaga) tidak menaikkan harga, untung yang diterima tidak setimpal dengan modal yang dikeluarkan. Isu kenaikan harga ini bukan sahaja menjejaskan ekonomi pelanggan, malah kami juga mangsa,” katanya.

Sementara itu, Roslin Ligin, 56, berkata, dia hanya mendapat keuntungan RM1 hasil jualan sayur-sayuran kampung yang diterima olehnya daripada kawan dan saudara mara.

“Harga cangkuk manis di pasar raya selalunya dijual sekitar RM7 hingga RM8 sekilogram tetapi saya jual dalam RM7 kerana harga yang saya dapat daripada orang kampung dalam RM5 sekilogram.

“Pucuk ubi pula saya jual RM2 seikat tetapi kalau beli tiga ikat saya jual RM5. “Semua sayur yang saya jual hari ini (semalam) akan habis hari ini tetapi kadang-kadang kalau tidak habis saya akan jual dengan harga yang lebih murah lagi.

Contohnya, sayur angka hari ini saya jual RM6 tetapi kalau tidak habis saya akan jual dengan harga RM4 keesokan harinya,” ujarinya. Roslin turut memberitahu bahawa kenaikan harga baja turut memberi kesan terhadap peningkatan harga sayur sayuran sekarang.

TARIKH	MEDIA	RUANGAN	MUKA SURAT
11/9/2022	HARIAN METRO	ONLINE	

KPDNHEP pantau harga ikan, sayuran



Kuala Terengganu: Kementerian Perdagangan Dalam Negeri dan Hal Ehwal Pengguna (KPDNHEP) Terengganu sentiasa melakukan pemantauan dan pemeriksaan di setiap peringkat pengedaran bagi memastikan tiada aktiviti pencatutan atau manipulasi harga.

Pengarahnya Saharuddin Mohd Kia berkata, pihaknya turut memberi jaminan akan menyiasat setiap aduan kenaikan harga secara terperinci di setiap peringkat pengedaran bermula daripada pengeluar, pemborong, pengedar dan peruncit bagi melihat punca berlakunya kenaikan harga.

Beliau berkata, KPDNHEP juga sentiasa bekerjasama dengan Kementerian Pertanian dan Industri Makanan (Mafi) bagi memastikan bekalan dan harga barangan kekal stabil.

"Di pihak KPDNHEP, kita memang sentiasa melakukan pemantauan daripada sudut harga bagi mengelak berlakunya aktiviti pencatutan.

"Jika berlaku kenaikan disebabkan bekalan berkurangan dan keadaan cuaca, kita faham kerana ia sedikit sebanyak akan mempengaruhi harga dan bekalan seperti keadaan yang berlaku ketika musim tengkujuh yang akan beri kesan kepada harga.

"Tetapi sekiranya ada pihak sengaja mengambil kesempatan menaikkan harga, kita boleh ambil tindakan di bawah Akta Kawalan Harga dan Anti Pencatutan 2011," katanya ketika dihubungi di sini, hari ini.

Saharuddin berkata, pihaknya sentiasa melakukan pemantauan perkembangan semasa harga bekalan keperluan harian terutama jika berlaku kenaikan harga.

Beliau berkata, pihaknya memohon kerjasama orang ramai untuk menyalurkan maklumat menerusi saluran aduan KPDNHEP Terengganu sekiranya berlaku kenaikan harga bagi membolehkan tindakan mengikut akta sedia ada dikenakan.

TARIKH	MEDIA	RUANGAN	MUKA SURAT
11/9/2022	UTUSAN MALAYSIA	ONLINE	

JPS Negeri Sembilan bina, naik taraf tujuh skim pengairan sawah padi



AMINUDDIN Harun (tiga dari kiri) dan Saari Abdullah (kanan) mengoca ikan pada program Pesta Tarik Tali Ngoca sempena Sambutan Hari Air Sedunia 2022 Peringkat Negeri Sembilan di Tapak Ngoca, Perkampungan Budaya Terachi, Kuala Pilah hari ini. - UTUSAN/MOHD. SHAHJEHAN MAAMIN

KUALA PILAH: Sebanyak tujuh skim pengairan bagi tujuan penanaman padi yang berada di bawah seliaan

Jabatan Pengairan dan Saliran (JPS) Negeri Sembilan kini dalam proses pelaksanaan pembinaan dan menaik taraf.

Pengarah JPS negeri, Ir. Saari Abdullah berkata, projek menerusi peruntukan melalui Kementerian Pertanian dan Industri Makanan itu bertujuan memastikan jaminan makanan negara itu sentiasa terpelihara.

“Skim Terachi antara yang diberi perhatian daripada keseluruhan skim-skim pengairan padi di Negeri Sembilan. Terdapat 14 skim pengairan kecil dengan keluasan 2,065 hektar di Negeri Sembilan yang mana terdapat 12 skim pengairan masih aktif dengan aktiviti penanaman padi.

“Ketika ini, tujuh skim pengairan yang berada di bawah seliaan JPS negeri sedang dalam pelaksanaan pembinaan bagi menaik taraf infrastruktur pengairan termasuk Skim Pengairan Terachi Batu 14 di mana terletak lokasi Tapak Ngoca, Perkampungan Budaya Terachi,” katanya.

Beliau berkata demikian kepada pemberita selepas program Pesta Tarik Tali Ngoca sempena Sambutan Hari Sungai Sedunia 2022 Peringkat Negeri Sembilan di Tapak Ngoca, Perkampungan Budaya Terachi di sini hari ini yang turut dihadiri Menteri Besar, Datuk Seri [Aminuddin Harun](#).

Sementara itu, Saari berkata, Pesta Tarik Tali Ngoca itu diadakan bagi mengimbau nostalgia aktiviti tradisional ‘mengoca’ iaitu menangkap ikan menggunakan tangan di sawah padi yang sinonim dengan penduduk di daerah ini. – [UTUSAN](#)

TARIKH	MEDIA	RUANGAN	MUKA SURAT
11/9/2022	SARAWAK VOICE	ONLINE	

Pertanian moden akan dibangun di Sri Aman: Abang Johari



Abang Johari melakukan simbolik perasmian Pesta Benak Sri Aman 2022, hari ini. Turut kelihatan, Harden (dua kanan), Uggah (tiga kanan), Dr Sim (depan, dua kiri) serta yang lain. - Gambar Japen

KUCHING: Kerajaan negeri dan persekutuan akan bekerjasama untuk membangunkan pertanian moden di kawasan Sri Aman yang dikenal pasti sebagai kawasan pengeluaran padi negara.

Premier Sarawak Datuk Patinggi Tan Sri Abang Johari Tun openg berkata, usaha itu harus dipergiat memandangkan projek pembinaan Jambatan Batang Lupar 2 yang sedang dilaksana bakal membuka kawasan berkenaan terutamanya dalam sektor pertanian.

Menurutnya, jambatan itu kelak bakal menyambungkan Sri Aman terus ke jalan utama kedua Sarawak hingga ke Jalan Pesisir dan seterusnya ke Betong.

“Kita akan membangunkan infrastruktur di kawasan ini nanti yang menelan belanja agak besar, saya telah berunding dengan kerajaan persekutuan untuk membangunkan kawasan terbabit disertai dengan dana kerajaan negeri.

“Ia adalah pembangunan usahasama kerajaan negeri dan persekutuan dan bagi Sarawak, Dr Rundi (Menteri Pemodenan Pertanian dan Pembangunan Wilayah Dato Sri Dr Stephen Rundi Utom) akan berunding dengan pihak persekutuan iaitu Dr Ronald (Menteri Pertanian dan Industri Makanan Datuk Seri Dr Ronald Kiandee),” ujarnya.

Beliau berkata demikian ketika berucap merasmikan Pesta Benak Sri Aman 2022 di Astaka Regata Benak di Sri Aman, hari ini.

Hadir sama majlis dua Timbalan Premier Datuk Amar Douglas Uggah Embas dan Dato Sri Dr Sim Kui Hian, Timbalan Menteri Pendidikan, Inovasi dan Pembangunan Bakat II (Pembangunan Bakat) yang juga ADUN Simanggang Datuk Francis Harden Hollis dan Timbalan Residen Bahagian Sri Aman merangkap Pengerusi Jawatankuasa Pesta Benak Elvis Didit.

Abang Johari berkata, usaha membangunkan pertanian moden di kawasan itu merupakan pendekatan selaras dengan nama baharu Kementerian Pemodenan Pertanian dan Pembangunan Wilayah yang akan diumumkan nanti, khusus untuk industri makanan.

Beliau berharap nama baharu kementerian itu nanti akan mengubah nasib para petani ke arah yang lebih baik dan bukannya digambarkan sebagai golongan susah.

Jelasnya, ini kerana sektor pertanian amat penting tetapi perlu menggunakan kaedah baharu seperti teknologi dan digital dalam pengeluaran makanan.

"Kita ada gambaran yang cerah dari sudut industri manakanan. Maka, saya dan Dr Rundi serta rakan lain mempunyai pendekatan baharu yang akan diumumkan kelak, sebaik sahaja infrastruktur siap dibina untuk kita membangunkan sektor pertanian," katanya.

Mengulas lanjut mengenai pembangunan Sri Aman, Abang Johari berkata, kerajaan negeri akan terus menaik taraf kemudahan Tebingan Sri Aman agar memberi keselesaan, selain mengubah landskap di sekitar kawasan terbabit.

Katanya, Tebingan Sri Aman yang sedia ada telah siap dibina dan memberi keselesaan kepada penduduknya, terutama semasa Pesta Benak.

"Namun, wakil rakyat anda di sini telah meminta kepada saya untuk menambahkan lagi kemudahan sehingga ke hulu sungai ini yang akan menempatkan kemudahan bagi mengangkat ikan.

"Dengan itu, kita akan menempatkannya di satu sudut spesifik yang tidak mengganggu tebingan yang ada pada hari ini," jelasnya.